

## Milanes spettasciaa o minga tropp

Ormai el capita molto de rar  
de legg i poesii de Carlo Porta.  
L'aveva faa on longh elench (me par)  
de Milanes ver e grand. Ona sporta!  
Ma dopo, quanti *divers* gh'è vegnuu!  
De quanti el nomm el s'è perfin perduu?

Ma se de la memoria pers s'è 'l fil,  
dent' in quell cunt bisognerà almen mett  
(guardando minga tropp per el suttil),  
i *Personagg* stranier e... del distrett.  
(Perfina sant Ambroeus e poeu Stendhal  
con l'att de nascita eren in fall!).

Donca: mettèmm, a cas, el Bonapart,  
el papa Anselm de Bagg e poeu Leonard,  
Hemingway e Einstein, Sforza, Mozàrt,  
Toscanin, Verdi, Rubbia e Leopard,  
quell sentimentalon de Cecch Petrarca,  
Renzo e Luzia (scappaa de nott in barca),

Carl Castiglion, Prefett de l'Ambrosiana  
(nativ però de Locà, vesin Comm),  
i Martinitt d'ingegn ch'hann faa la grana,  
i Architett todèsch ch'hann progettaa 'l Domm.  
Ormai ne riven de tutti i Paes.  
Ma quand che resten chì, hinn... Milanes!